

Celebracion di Arubadag na Hulanda tabata tremendo

Den Haag – E comunidad Arubano na Hulanda a celebra en grande Arubadag 2006 ariba diadomingo 12 di Maart den Groenordhallen na Leiden. Un publico grandi a bini Leiden pa gosa di nos artistanan for di Hulanda y tambe for di Aruba. E celebracion e aña aki tabata den cuadro di celebracion di 30 aña di Himno y Bandera y 20 aña di Status Aparte. A conta cu presencia di hopi dignatarioman, manera Ministro pa Asuntunan di Reino drs. Alexander Pechtold, Minister di Husticia mr. Piet Hein Donner, Ministro Plenipotenciario di Antia sr. Paul Comenencia, Ministro Plenipotenciario di Aruba sr. Frido Croes anfitrión di e dia. Tambe presente tabata presidente di Eerste Kamer sra. Yvonne Timmermans-Buck, presidente suplente di Tweede Kamer Sr. Jan ten Hoopen, presidente di Comision Permanente di Tweede Kamer pa Asuntunan Antiano y Arubano sr. Willibrord van Beek.

Di parti di parlamento Hulandes tabata presente miembronan di Tweede Kamer sr. John Leerdam y miembro di Eerste Kamer Sra. Ing Yoe Tan. Diferente embahadoman, representante di organisacionnan Arubano, sponseman y personal di Cas di Aruba a presencia e programa. E presentacion tabata na encargo di Curt Fortin. Nos himno nacional Aruba Dushi Tera a keda canta pa e hoben cantante Solange Trimon. E parti protocolario a consisti di discurso di presidente di e comision organisado, Ministro pa Asuntunan di Reino, Ministro Plenipotenciario di Antia y Ministro Plenipotenciario di Aruba. Sr. Kenky Oduber a gradici tur esnan cu a yuda den e preparacion pa e celebracion di Arubadag 2006. Un palabra special na e sponsornan cu danki na nan sosten financiero e evento aki por keda organisa den e forma aki. Minister pa Asuntunan di Reino

sr. Alexander Pechtold a felicita Aruba cu e dobel lustro aki. E mandatario a repasa e ultimo binti aña di Status Aparte y a bisa cu Aruba a haci un bon papel. Sr. Pechtold a bisa cu e frase 'Nos Baranca tan stima' for di Himno di Aruba ta simbolo pa e amor cu e Arubano tin pa nan pais. Segun e mandatario Aruba por sirbi como ehemplo pa e islanan di Antia pa e proceso nobo di estructura estatal cu Antia ta den dje awor. Di su parti Minister Plenipotenciario di Antia sr. Paul Comenencia a felicita Aruba cu nan dia nacional. Sr. Comenencia a bai den su discurso ariba e negoshacionnan ariba tereno di estructura estatal y e consecuencia cu esaki tin pa e diferente islanan. E mandatario Antiano a gradici Aruba pa e cooperacion ricibi den e proceso nobo aki cu e islanan ta aden. Den su discurso Minister Plenipotenciario di Aruba sr. Frido Croes a bisa di ta sinti honra cu pa prome biaha ta dirigi



palabra na Arubadag den cuadro di su funcion como Minister Plenipotenciario. Cu awe Aruba ta celebra 30 aña di Himno y Bandera y 20 aña di Status Aparte ta marca un momento remarkable den e historia excitante di nos pais. Sr. Croes e accentua cu Aruba a encamina un ruta largo pa por logra un anhelo grandi. 'Y ta pesei cu awe cu nos ta den e celebracion asina especial, nos no por keda sin menciona e nomber di esun cu a guia nos na loke nos tin awe, esta nos Libertador G.F. (Betico) Croes, en feliz memoria. 'Si nos wak atras riba loke a pasa cu Aruba durante e binti añanan, nos por bisa cu e decision tabata un bon decision.' Tambe segun sr. Croes nos por constata cu nos Pais a madura y cu e relacion cu partnerman den Reino ta riba un base di respet y confiansa mutuo. E mandatario a enfatisa e cooperacion di Aruba cu Antia por conta ariba dje pa e cambianan den nan estructura estatal. Finalmente e Minister Plenipotenciario a gradici Hulanda y Antia pa e sosten duna na Aruba durante e binti aña y cu Aruba semper lo keda para cla pa contribui na un desaroyo positivo den Reino Hulandes.

E parti cultural a cuminsa cu actuacion di Sabor Crioyo cu a acompaña Reynaldo Maduro cu su 'Un Cancion pa mi Aruba' y tambe dos medley: un di walsnan y un di tumbanan. Grupo di Baile Xanadu a baile un dansa folclorico y despues sigui pa actuacion di Alma Latina cu musica di harpa. Mariachi 'Mil Amores' a deleita e publico presente cu musica Mexicano cu ta masha gusta bou di nos Arubananan. Un momento special ta ora cu director di Caribbean Mercantile Bank sr. Javier Wolter a haci entrega di donacionnan na

organisacionnan Arubano aki na Hulanda cu ta yuda tene nos cultura aki na Hulanda na halto: Organisacion Nos Baranca for di Tilburg y Contacto Arubano Rotterdam. E presidentenan respectivamente Sra. Mena Maduro y Sra. Ema Diaz a ricibi e donacion for di man di Sr. Wolter. Ambos a gradici CMB pa e bunita gesto aki y sosten pa nan trabounan na Hulanda pa cu nos cultura Arubano. Un momento emocionante tabata ora cu Minister Plenipotenciario sr. Frido Croes a haci entrega ariba esenario di un plakkaat na sra. Rosinda (Dechi) Langedijk-Thijssen cu tabata responsabel pa e prome Arubadag na Hulanda. Ariba e plakkaat a keda inscribi 'Pa su dedicacion y curashi pa hunto cu otro Arubananan orguyoso aki na Hulanda celebra e prome Arubadag riba 6 di Juni 1976'.

E grupo di baile Xanadu a clausura e parti cultural cu un baile carnavalesco. Prome cu e parti bailabel e publico por a gosa di musica di Authority Brass Band. Despues di un pause tabata tin presentacion di Youth Extreme y for di Aruba Claudius Philips y ORO. Youth Extreme cu ta hopi gusta bou di e hubentud Arubano a un tremendo presentacion como e prome grupo musical cu a cuminsa cu e parti bailabel. E publico cu a cuminsa drenta den e ambiente a sigui baila te final ariba ritmo nan di ORO cu a pone e publico den un ambiente total. E comision organisado por mira atras ariba un Arubadag 2006 hopi exitoso, unda e comunidad Arubano y amigonan di Aruba e celebra nos Dia di Himno y Bandera y e celebracion special e aña aki en grande y den un ambiente sumamente ameno.